



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**23. Kalenderwoche – ab 6. Juni 2010**

## Liesche un Wahrheit

Nee, isch du lieber nisch lieschn! Äh, isch meene, isch liesch gerne im Bedde rum odor offm Sofa, aber isch du lieber nisch lieschn! Also, Lieschn sachn. Das Geschndeel von Wahrheit sachn!

Hammstes jedzde? Ja, Lieschn haben kurze Beene!

Wobei - Lieschn ham nisch bloß kurze Beene, sondern ooch noch eene ganz annre beesardische Eischnschafd - se sin nisch lange haldbar! Eene frische Liesche dud innorhalb von wenische Schdundn schleschd wern, dud sich in Lufd offleesn. Ja, Lieschn dun sich schnell vorflieschn!

Un dann weeße einfach nisch mähr, was de gelochn hasd! Isch hab da mansche biddore Erfahrung machn missn. Grade geschnibor meinor Gudstn! Die weeß noch nach Jahre, was isch gelochn hab. Isch nisch! Zum Beischbiel - had se kirzlich gesachd: "Aber du hasd doch damals gesachd, dass du misch fiehr immor liehm dusd!"

Un isch weeß nischd mähr dadervon! Un isch kann ja nu schleschd zugähm, dass isch dazumals bloß gelochn hab. Dscha, un off die Ard un Weise wern mir nu beschdimmd noch e baar Jahre zusambleim. Bis zum biddoren Ende. Nee, Lieschn sinn sähr gefährlich!

Aber wensde immor de Wahrheit sachn dusd, kommsde ooch nisch weid. Ohne die Liesche von dazumals, vonweschn Liebe un so, ohne die hädde isch bis heide keene Kinnor!

Odor ooch zum Beischbiel - wensde deem Scheff ganz offn sachn dusd, dass de ihn fiehr e

riesngroßes Arschloch haldn dusd, dann is das beschdimmd nisch sähr gindisch fiehr deine Garrjähre! Odor wensde Vorsischorungsvordrähdor bisd un dusd dähn Leidn erzähln, dass eischendlich nach dor Wahrscheinlichkeid gereschnd, de meisdn Vorsischorungen genau so sinnlos sin, wie wensde Loddos schbieln dusd, dann wirsde nisch viel Brovisjohn erwirtschaftdn. Wobei - genau wie beim Loddos, wos jede Woche jemand mid eim Haubdgewinn erwischn dud, so isses ehm ooch bei Schadn un Besch - irschendwo duds immor widdor een erwischn, dähr off de Nase falln dud. Un wenn dähr dann nisch vorsischord is... - da haddor de Brille off! Wenn die nisch ooch noch mid kabudd is!

Nascha, jednfalls is de Wahrheit nisch grade eene Allweggwaffe. Ooch de Wahrheit mussde sähr dosierd eingesedzn! Vorausgesezde nadiehrlich, dass de de Wahrheit ooch weeßd!

Wensde de Wahrheit gahr nisch wissn dusd, dann kannsde die nisch sachn. Dann kannsde abor ooch nisch lieschn. Liesche is ja bloß dann Liesche, wensde de Wahrheit weeßd. Ohne Wahrheit duds keene Liesche gähm. Ohne Wahrheit is de Liesche eenfach bloß Doofheid!

Nemmse ma bloß unsre Bollediggor - die aus dor Regierung - Dräsdn odor Bährlin - egahl! Nee, die dun nisch lieschn! Die dun doch gloom, dass de Wahrheit sachn! Un währ gloom dud, dassor de Wahrheit sachd, dähr dud ja nisch lieschn! Dähr is ehm bloß e bißl doof! Nee, da mussde schon ma de Gereschdischkeed walldn lassn! Unsre Bollediggor sin keene Lieschnor!

**Eduard Sachsenmeyer**